

IN CHIP PER IN NA FA MAL A NAGIN

TGI ÈN INSUMMA QUELLAS PERSONAS CHE REPARTAN GRATUITAMAIN DA TUTTA SORT PRODUCTS? NUS AVAIN DISCURRÌ CUN NICOLE CHE REPARTEVA CHIPS PER ZWEIFEL.

Sonda da mezdi, il sulegl stganda, las emprimas gruppas da personas sa movan sin l'areal da concert da l'Open Air Lumnezia. I n'è anc betg roschadas, ma era betg mo ils singuls utschels da la damaun ch'eran sa rendids nà qua per ensolver u per cumprar lur emprima gervosa da la sonda.

PER GUDAGNAR SPERT IN PAU DANERS

Qua a l'entrada survegn ins enta maun in pac chips, u era plirs, sch'ins na sa mova betg gist vinavant. Duas figuras resch oranschas - dal chapè sin chau enfin l'ur da las chommas da lur overal - portan in'immensa tastga oranscha (che n'è probablmain betg talmain greva, considerond la bler'aria ch'è per il pli en ils pacs da chips) e repartan pachets da chips. Ina da quellas figuras è Nicole che fa gia dapi insaquants onns la lavur da repartaproducts-da-reclama. Ussa ch'ella è en scolaziun saja quai ina lavur ideala per gudagnar daners. Sch'ins dovra daners, fan ins forse era reclama per products, davos ils quals ins na sa betg star tschient per tschient? Quai saja stà il cas mo ina giada, cura ch'ella era turnada da l'exteriur e duvrava spert puspè daners. Normalmain sappia ella dentant represchentar mintga product.

CO CHATT'INS INA TALA LAVUR?

Nicole è vegnida a quella lavur entras in ami. Per il pli s'annunzian ins dentant tar in'agentura che procura lura per il contact cun ina firma. Sch'ins lavuria bain, vegnian ins per il pli adina puspè dumandà da quella firma per ulteriurs engaschaments. Lura sajan els - savens pli u main adina las medemas personas - sin viadi ad occurrenzas pli grondas sco ils open airs. Questa stad saja ella per exempel oravant tut sin viadi per Zweifel, tranter auter er als open airs da Frauenfeld, Gampel e Heitere. La lavur duria ca. 6 fin 7 uras, da mezdi fin la saira. Per il pli hajan els a disposiziun bons per mangiar e baiver e qua hajan els ina chombra en in hotel a Glion.

SCHON ANC SPEZIAL DAD UDIR LIVE IL RUMANTSCH

Ussa è Nicole pia en Lumnezia; emprend'ins entras quella lavur era d'enconuscher in pau la Svizra? Ella enconuschia gia vaira bain la Svizra, ma fin en quella vallada na saja ella propi anc mai stada. I saja schon



anc insatge spezial qua, oravant tut era dad ina giada udir live la lingua rumantscha. Ma ils blers, cun ils quals ella haja contact entras sia lavur, discurren directamain tudestg cun ella.

Sch bain ella haja l'impressiun che quellas acziuns da reclama portian insatge, avain nus anc vulì savair da Nicole. Quai n'ha ella betg pudì dir en furma da cifras. Tscherts open airs vendian dentant era gist ils products che vegnan repartids (sa chapescha en grondezzas pli grondas); qua a Degen ussa betg. Ella speria dentant ch'insatgi vegnia sin il gust dad ina u l'autra varianta da quels products. Nus da las Punts en mintga cas - la finala essan nus ans nutrìs fin il suentermezdi da las quatter mo da quels chips.



da Silvana Derungs
ed Annatina Dermont